

VENDIM
Nr.311, datë 21.5.2004

**PËR KOMPENSIMIN E QIRASË SË BANESES PËR PUNONJËSIT E PASTREHË TË
GARDËS SË REPUBLIKËS TË SHQIPËRISË, NË RAST TRANSFERIMI**

Në mbështetje të nenit 100 të Kushtetutës, të pikës 2 të nenit 37 të ligjit nr.8869, datë 22.5.2003 “Për Gardën e Republikës së Shqipërisë” dhe të nenit 24 të ligjit nr.8379, datë 29.7.1998 “Për hartimin dhe zbatimin e Buxhetit të Shtetit të Republikës së Shqipërisë”, të ndryshuar, me propozimin e Ministrit të Rendit Publik, Këshilli i Ministrave

VENDOSI:

1. Punonjësit e pastrehë të Gardës së Republikës të Shqipërisë, në rast transferimi për nevoja pune e shërbimi jashtë vendbanimit, përfitojnë shpërblimin mujor për kompensimin e qirasë së banesës, deri në sigurimin e banesës nga shteti, në masën dhe kriteret e përcaktuara si më poshtë vijon:

a) 70 për qind të çmimit mesatar mujor të tregut, për qira banese të tipit garsonierë, kur nuk ka persona të tjerë në ngarkim;

b) 70 për qind të çmimit mesatar mujor të tregut, për qira banese të tipit 1+1, kur ka në ngarkim deri në dy persona;

c) 80 për qind të çmimit mesatar mujor të tregut, për qira banese të tipit 2+1, kur ka në ngarkim më shumë se dy persona.

Çmimi mesatar i qirasë së banesës përcaktohet, çdo vit, nga Garda e Republikës, duke u bazuar në të dhënat e Institutit të Statistikës (INSTAT).

2. Punonjësit që përfitojnë shpërblim mujor për banesë, duhet të paraqesin pranë Gardës së Republikës, këto dokumente:

a) kërkesën për kompensimin e qirasë;

b) certifikatën personale;

c) certifikatën familjare;

ç) vërtetimin, si i pastrehë, nga organet e pushtetit vendor, ku ka vendbanimin;

d) vërtetimin nga dega e tatim-taksave, për mosushtrim veprimtarie private;

dh) kontratën e qirasë së banesës, të noterizuar.

3. Efektet financiare që rrjedhin nga zbatimi i këtij vendimi, të përballohen nga buxheti vjetor i Ministrisë së Rendit Publik.

4. Ngarkohet Ministri i Rendit Publik për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Fatos Nano